



FA'ATERERA'AHAU
NO TE NOHORA'A E
TE FA'ANAHORA'A FENUA,
ha'apa'o i te utara'a nā te mau motu

FA'AOTIRA'A HAU N°00650/CM no te 2 no tiunu 2020

I ni'a i te fa'aturera'a no te tūtaura'a e te tāpe'ara'a pahī i ni'a i te tairoto i te hiti o nā 'oire no Fā'ā'ā e Puna'auia.

TE PERETITENI NO PORINETIA FARANI

NOR :
DAM1921908AC-1

Nā ni'a i te parau fa'ata'ara'a a te Fa'aterehau no te nohoro'a e te fa'anahoro'a fenua, ha'apa'o i te utara'a nā te mau motu ;

Ia au i te ture manafa'atere n° 2004-192 no te 27 no fepuare 2004 tei fa'ahuru'ehia, i ni'a i te papature 'ōtōnōmī no Pōrīnetia farāni, 'āmuihia i te ture n° 2004-193 no te 27 fepuare 2004 e fa'anava'i nei i te papature 'ōtōnōmī no Pōrīnetia farāni ;

Ia au i te fa'aotira'a hau n° 650 PR no te 23 no mē 2018 i ni'a i te nōminora'ahia te Mono-Peretiteni e te mau Fa'aterehau no te fa'aterera'a hau no Pōrīnetia farāni, tei fa'ata'a mai i tō rātou tōro'a ;

Ia au i te puta ture no te arutaimāreva no Pōrīnetia farāni ;

Ia au i te fa'auera'a mana n° 77-778 no te 7 no tiurai 1977 i ni'a i te fa'aturera'a aopapa no te araira'a i te mau 'atī ūra'a pahī i ni'a i te moana ;

Ia au i te fa'auera'a mana n° 84-810 no te 30 no 'ātete 1984 i ni'a i te fa'aorara'a i te ta'ata i ni'a i te moana, te nohoro'a i ni'a i te pahī e te araira'a i te ha'avi'ivi'ira'a ;

Ia au i te fa'aotira'a rahi n° 62-2 no te 5 no tenuare 1962 tei fa'ahuru'ehia, i ni'a i te fa'atupura'a e te fa'anahoro'a o te Pū Uāhu no Papeete ;

Ia au i te fa'aotira'a rahi n° 2001-5 APF no te 11 no tenuare 2001 tei fa'ahuru'ehia, i ni'a i te mau fa'anahoro'a i fa'ata'ahia i roto i te puta ture a te mau uāhu no Pōrīnetia farāni ;

Ia au i te fa'aotira'a rahi n° 2004-34 APF no te 12 no fepuare 2004 tei fa'ahuru'ehia, i ni'a i te nōminora'a mero tōmite e te ti'a'aura'a o te tuha'a fenua hau i Pōrīnetia farāni ;

Ia au i te fa'aotira'a hau n° 929 CM no te 18 no tiurai 2012 tei fa'ahuru'ehia i ni'a i te tuha'a fenua e pi'ihia nei "ārea ti'a'auhia e te uāhu" a te uāhu no Papeete ;

Ua tuatāpapa te 'Āpo'ora'a Fa'aterehau i tā na rurura'a no te 27 no mē 2020

FA'AOTIRA'A

Fa'aturera'a rahi e fa'a'ohipahia i ni'a i te mau tairoto

Trava 1.- Fa'ata'ara'a

No te fa'a'ohipara'a o teie fa'aotira'a hau, te parauhia nei :

- tāpe'ara'a : ia mau maita'i te pahī mā te fa'a'ohipa i te tahi rāve'a mata'i maitata'i, no te tahi tau fa'ata'ahia, i muri a'e i te noa'ara'a mai te parau fa'ati'a mai roto mai i te feiā mana ;

Parau 'āpiti :

PR 1
VP 1
SGG 1
REG 1
Fa'aterera'ahau ato'a 1
Pū 'ohipara'a ato'a 1
MLA 1
JOPF 1

Ve'a mai'oi:

HC 1

Lexpol :

SCM
DMRA



- tūtaura'a : te tāpe'ara'a ia i te pahī, mā te fa'a'ohipa i te tūtau (tauha'a pahī), aore ra i te tahi atu rāve'a tūtaura'a ;
- rāve'a tūtaura'a : vāhi tāpe'ara'a pahī e 'ore e ha'uti'uti fa'ahou (pōito, pōito mānu, tūtau farero, ...) ia mau maita'i te pahī ;
- ti'a mana ti'a'au i te mau ārea fa'ata'ahia : te ti'a mana ia i fa'ata'ahia no te fa'ana'ahora'a i te mau fa'a'auera'a o teie fa'aotira'a hau, 'oia ihoā i te pae no te ti'a'aura'a i te mau anira'a no te tomora'a i te tahi ārea fa'ata'ahia e te tāpe'ara'a i te pahī i reira.

‘Īrava 2.- Tumu parau

E fa'aotira'a hau teie no te fa'aturera'a e te fa'ata'ara'a i te mau ārea fa'aineinehia no te tāpe'ara'a e te tūtaura'a i te mau pahī i ni'a i te tairoto i te hiti o nā 'oire no Faa'a e Punaauia.

Ua oti teie mau ārea i te motihia i ni'a i te mau hōho'a fenua i 'āpitihia i teie nei fa'aotira'a.

Maoti ra 'ei fa'aotira'a pāto'i, 'aita te mau pahī i raro mai aore ra i 'aifāito noa te roara'a i te ono (6) metera, o te fa'aea mai no te maorora'a e iti mai aore ra e 'aifāito noa i te piti 'ahuru mā maha (24) hora, e ō mai i roto i te mau fa'ata'ara'a a teie fa'aotira'a hau.

‘Īrava 3.- ‘Ōpani-tāmau-ra'a i te tūtaura'a e te tāpe'ara'a pahī

‘Ōpani-‘eta’eta-roa-hia i te tāpe'ara'a i te pahī i te mau vāhi i rāpae'au i te mau ārea fa'aineinehia ia au i te mau fa'ata'ara'a a te 'Īrava 6 e tei tāhōho'ahia i ni'a i te hōho'a fenua i 'āpitihia i teie nei fa'aotira'a hau.

No te tūtaura'a e te tāpe'ara'a i te pahī, e aha noa atu te maorora'a e, e aha noa atu te huru pahī, 'ōpani-‘eta’eta-roa-hia te reira i te mau ārea no VAIRAI tei fa'ata'ahia i te 'Īrava 7 e tei tāhōho'ahia i ni'a i te hōho'a fenua i 'āpitihia i teie nei fa'aotira'a hau.

‘Ōpanihia te tūtaura'a aore ra te tāpe'ara' i te pahī i roto i te mau arapahī tāpōitohia e te mau ava.

‘Īrava 4.- Ha'apaera'a

E'ita roa ia te mau 'ōpanira'a e te mau fa'ata'ara'a ato'a i tāpurahia i roto i teie nei fa'aotira'a hau e fa'ahepohia i ni'a i te mau pahī e te mau faura'o e rave nei i te 'ohipa nā te hau 'oia ihoā ra te mau faura'o e te mau pahī e teretere ra no te hi'opo'ara'a, te tauturura'a i te ta'ata e te faufa'a rau, te 'atu'atura'a e te tātā'ira'a, e'ita ato'a te reira e ma'iri mai i ni'a i te mau pahī e fa'aruru nei i te tahi fifi.

PENE II - Te mau fa'aturera'a e fa'a'ohipahia i ni'a i te mau tairoto

‘Īrava 5.- Fa'ana'ahora'a no te tūtaura'a e te tāpe'ara'a pahī

Fa'ati'ahia te tūtaura'a e te tāpe'ara'a i te pahī i ni'a i te mau mauha'a tā'amura'a pahī tano maita'i, i te mau ārea e fa'ata'ahia ra i roto i te 'Īrava 6 o teie nei fa'aotira'a hau. 'Ōpani-roa-hia te tāpe'ara'a pahī mā te fa'a'ohipa i te tūtau i taua mau ārea nei.

Nā te tahi ti'a mana fa'ata'ahia e hōro'a i te parau fa'ati'a no te tāpe'ara'a i ni'a i te tuha'a moana hau e fa'ata'ahia ra i roto i te 'Īrava 6 o teie nei fa'aotira'a hau. Hōro'ahia teie parau fa'ati'a no te tahi tau poto noa e te riro i te fa'a'orehia e aha noa atu te taime, e tūtauhia te 'aufaura'a i te tute no te fāna'ora'a i teie parau fa'ati'a.

‘Īrava 6.- Motira'a o te mau ārea fa'aineinehia no te tūtaura'a e te tāpe'ara'a pahī fa'ati'ahia

Te fa'ata'ahia nei te mau ārea fa'aineinehia no te tūtaura'a e te tāpe'ara'a pahī fa'ati'ahia ia au i te motira'a i tāpurahia i muri nei :

1°) **Ārea P0 : Marina Taina 'apato'a** ('oire no Punaauia)

Te 'itehia nei te mau 'ōti'a e fa'a'ati ra i te ārea fa'aineinehia ia au i te mau rēni e tū'ati'ati nei i te mau poro i muri nei :



Vaira'a	I'oa	Rēni ti'a	Rēni tārava
Ārea P0 Marina Taina 'apato'a ('Oire no Punaauia)	P0.1	149° 37,072'	17° 35,241'
	P0.2	149° 37,059'	17° 35,318'
	P0.3	149° 36,928'	17° 35,468'
	P0.4	149° 36,911'	17° 35,525'
	P0.5	149° 37,024'	17° 35,583'
	P0.6	149° 37,144'	17° 35,520'
	P0.7	149° 37,195'	17° 35,415'

2°) **Ārea P1 : Marina Taina 'apato'erau** ('oire no Punaauia)

Te 'itehia nei te mau 'ōti'a e fa'a'ati ra i te ārea fa'aaineinehia ia au i te mau rēni e tū'ati'ati nei i te mau poro i muri nei :

Vaira'a	I'oa	Rēni ti'a	Rēni tārava
Ārea P1 Marina Taina 'apato'erau ('Oire no Punaauia)	P1.1	149° 37,388'	17° 34,505'
	P1.2	149° 37,083'	17° 35,173'
	P1.3	149° 37,078'	17° 35,207'
	P1.4	149° 37,252'	17° 35,203'
	P1.5	149° 37,367'	17° 34,927'
	P1.6	149° 37,426'	17° 34,735'
	P1.7	149° 37,433'	17° 34,504'

3°) **Ārea P2 : 'Ō'o'ā no Vaitupa** ('oire no Faa'a)

Te 'itehia nei te mau 'ōti'a e fa'a'ati ra i te ārea fa'aaineinehia ia au i te mau rēni e tū'ati'ati ra i te mau poro i muri nei :

Vaira'a	I'oa	Rēni ti'a	Rēni tārava
Ārea P2 'Ō'o'ā no Vaitupa ('Oire no Faa'a)	P2.1	149° 37,164'	17° 33,920'
	P2.2	149° 37,022'	17° 34,110'
	P2.3	149° 37,245'	17° 34,077'
	P2.4	149° 37,228'	17° 33,960'

Tū'atihia na poro P2.1 et P2.2 e te rēni i te hiti.

4°) **Ārea P3 : 'Apato'erau-to'o'ā no Motu Tahiri** ('oire no Faa'a)

Te 'itehia nei te mau 'ōti'a e fa'a'ati ra i te ārea fa'aaineinehia ia au i te mau rēni e tū'ati'ati ra i te mau poro i muri nei :

Vaira'a	I'oa	Rēni ti'a	Rēni tārava
Ārea P3 'Apato'erau-to'o'ā no Motu Tahiri ('Oire no Faa'a)	P3.1	149° 37,085'	17° 32,875'
	P3.2	149° 37,061'	17° 32,909'
	P3.3	149° 37,306'	17° 33,075'
	P3.4	149° 37,340'	17° 33,017'

5°) **Ārea P4 : 'Apato'erau no Motu Tahiri** ('oire no Faa'a)

Te 'itehia nei te mau 'ōti'a e fa'a'ati ra i te ārea fa'aaineinehia ia au i te mau rēni e tū'ati'ati ra i te mau poro i muri nei :



Vaira'a	I'oa	Rēni ti'a	Rēni tārava
Ārea P4 'Apato'erau no Motu Tahiri ('Oire no Faa'a)	P4.1	149° 36,866'	17° 32,752'
	P4.2	149° 36,858'	17° 32,799'
	P4.3	149° 36,996'	17° 32,821'
	P4.4	149° 37,005'	17° 32,775'

6°) **Ārea P5: 'Apato'erau-hiti'ā no Motu Tahiri** ('oire no Faa'a)

Te 'itehia nei te mau 'ōti'a e fa'a'ati ra i te ārea fa'aineinehia ia au i te mau rēni e tū'ati'ati ra i te mau poro i muri nei :

Vaira'a	I'oa	Rēni ti'a	Rēni tārava
Ārea P5 'Apato'erau-hiti'ā no Motu Tahiri ('Oire no Faa'a)	P5.1	149° 36,211'	17° 32,592'
	P5.2	149° 36,205'	17° 32,631'
	P5.3	149° 36,326'	17° 32,648'
	P5.4	149° 36,332'	17° 32,609'

7°) **Ārea P6 : Nord-ouest du Motu Tahiri** ('oire no Faa'a)

Te 'itehia nei te mau 'ōti'a e fa'a'ati ra i te ārea fa'aineinehia ia au i te mau rēni e tū'ati'ati ra i te mau poro i muri nei :

Vaira'a	I'oa	Rēni ti'a	Rēni tārava
Ārea P6 'Apato'erau-to'o'ā no Motu Tahiri ('Oire no Faa'a)	P6.1	149°37,179'	17°33,002'
	P6.2	149°37,116'	17°33,009'
	P6.3	149°37,046'	17°33,054'
	P6.4	149°37,298'	17°33,423'
	P6.5	149°37,336'	17°33,593'
	P6.6	149°37,391'	17°33,582'
	P6.7	149°37,456'	17°33,485'
	P6.8	149°37,472'	17°33,427'
	P6.9	149°37,457'	17°33,360'
	P6.10	149°37,296'	17°33,123'

No roto mai te mau fa'ata'ara'a rua mata'i i te fa'anahora'a rua mata'i aopapa WGS84 'ei teteri e 'ei miniti tomahia.

Īrava 7.- Motira'a no te hō'ē ārea 'ōpanihia no te tūtaura'a e te tāpe'ara'a mure 'ore

Te 'itehia nei te mau 'ōti'a e fa'a'ati ra i te ārea fa'aineinehia ia au i te mau rēni e tū'ati'ati ra i te mau poro i muri nei :

Ārea no Vairai :

Vaira'a	Fa'ata'ara'a	I'oa	Rēni ti'a (W)	Rēni tārava (S)
Ārea VAIRAI	'Outu TATA'A	VA1	149° 37,223'	17° 34,449'
	Pōito 'auī n° ESM 8-40	VA2	149° 37,318'	17° 34,505'
	'Ōpaera'a arati'a i rōpū i te arapahī e te 'ōti'a 'apato'erau o te marina Taina	VA3	149° 37,076'	17° 35,043'



	'Outu 'apato'erau-to'o'ā, pae uta, o te marina Taina	VA4	149° 37,015'	17° 35,039'
--	--	-----	--------------	-------------

Tū'atihia nā poro VA1 e VA4 e te rēni i te hiti.

No roto mai te mau fa'ata'ara'a rua mata'i i te fa'anahora'a rua mata'i aopapa WGS84 'ei teteri e 'ei miniti tomahia.

‘Īrava 8.- Tāpa'o 'itea o te mau ārea fa'ati'ahia no te tūtaura'a e te tāpe'ara'a pahī

E ti'a te tahi mau tāpa'o 'itea i te fa'anahohia e te ti'a'au ārea no te fa'a'itera'a i te mau ārea fa'ati'ahia no te tūtaura'a e te tāpe'ara'a pahī.

Ua fa'atanohia te mau tāpa'o 'itea i te huru o te tairoto.

Tītauhia te ti'a fa'ata'ahia no terā e terā ārea fa'ati'ahia no te tūtaura'a e te tāpaera'a pahī i te fa'aara ha'ape'epe'e noa i te mau ti'a mana i te huru tauira'a ato'a e tupu mai i ni'a i te mau fa'anahora'a tāpa'o 'itea.

‘Īrava 9.- Te tomora'a e te fa'aturera'a i ni'a i te fa'aterera'a pahī i roto i te mau ārea fa'ati'ahia no te tūtaura'a e te tāpe'ara'a pahī

Ia fa'aturahia te mau fa'aturera'a ato'a no te terera'a pahī i te taime a tāpae ai te tahi pahī i roto i te mau ārea fa'ati'ahia no te tūtaura'a e te tāpe'ara'a pahī, 'oia ihoā ra te mau fa'aturera'a aopapa i ni'a i te araira'a o te 'ati ūra'a pahī.

Tei ni'a ia te fāito vitiviti fa'aturehia i roto i teie mau ārea fa'ati'ahia i te 5 maira/hora.

Mai te mea noa atu te vai ra te tahi fifi, fa'ati'a-noa-hia te mau pahī i te tere i roto i teie mau ārea no te haere ti'a atu i ni'a i te mau vāhi tūtaura'a e tāpe'ara'a pahī e te fa'aru'era'a i taua mau vāhi ra.

E ti'a ato'a ia te tahi mau fa'aturera'a ta'a'ē i te fa'ahitihia i roto i te puta ture terera'a pahī no Pōrīnetia farāni.

‘Īrava 10.- Fa'aarara'a i te tomora'a e te fa'aru'era'a

Tītauhia te pahī e tomo mai i roto i te ārea fa'ati'ahia no te tūtaura'a e te tāpe'ara'a pahī i te fa'a'ite i tō na tomora'a e tō na fa'aru'era'a i taua ārea.

- Ia fa'aotihia taua fa'a'itera'a i mua i te mau ti'a mana fa'ata'ahia.

‘Īrava 11.- Te fa'a'ohipara'a i te mau ārea tūtaura'a e tāpe'ara'a pahī fa'ati'ahia

Ia ha'apa'o maita'i te tāpena o te tahi pahī ia 'ore tō na pahī ia fa'atupu noa a'e i te tahi fifi i ni'a i te tahi atu pahī, e aha noa atu te taime, e ia 'ore ato'a tō na pahī ia riro 'ei ha'afifira'a no te terera'a pahī o te tahi atu fatu pahī, i roto i te tahi ārea fa'ati'ahia no te tūtaura'a e te tāpe'ara'a pahī.

Mai te mea te vai ra te ha'afifira'a, ia ha'apa'ohia te huru fa'anahora'a pāruu e ti'a, i te taime fa'aterera'a pahī, te taime tauira'a vāhi tūtaura'a mā te fa'atura i te mau fa'auera'a a te ti'a mana aore ra a te ti'a fa'ata'ahia, i te taime ihoā ra e tītauhia i te fa'a'ōhie i te terera'a o te tahi atu mau pahī aore ra no te pāruu'a i te terera'a pahī i roto i te mau ārea tūtaura'a e tāpe'ara'a pahī fa'ati'ahia.

‘Īrava 12.- Te ea e te ha'avi'ivi'ira'a

Nā ni'a i te fa'a'ohipara'a o te puta ture no te arutaimāreva e te puta ture no te mau uāhu no Pōrīnetia farāni, 'ōpani-'eta'eta-roa-hia te mau pahī ato'a e tūtau nei i roto i te hō'ē o te mau ārea fa'ati'ahia no te tūtaura'a e te tāpe'ara'a pahī i te fa'aru'era'a, i te māni'ira'a aore ra i te fa'ahaerera'a i roto i te tai i tā rātou mau huru pehu ato'a, 'eiaha ato'a te mau pape 'ino aore ra te pape i 'ī roa i te vi'ivi'i, te mōrī e te hinu mātini, aore ra te huru tao'a ta'ero ato'a.

Ia tu'uhia te mau huru pehu ato'a i te mau vāhi e i roto i te mau fa'ari'i i fa'ata'ahia no te reira mau tao'a. Te vai ra te fa'aturera'a ta'a'ē no te mau pape vi'ivi'i.

'Ōpanihia i te ravera'a i roto i te mau ārea fa'ati'ahia no te tūtaura'a e te tāpe'ara'a pahī, i te mau huru 'ohipa tātā'ira'a e te 'ohipa 'atu'atura'a pahī e tae noa atu i te 'ohipa pēnira'a.



‘Īrava 13.- Fa’aātea’ēra’a i te mau pahī ‘ōtare e te mau pahī fa’aru’ehia

Nā ni’a i te fa’a’ohipara’a i te puta ture o te mau uāhu no Pōrīnetia farāni, tītauhia te mau pahī ato’a e vai nei i roto i te mau ārea fa’ati’ahia no te tūtaura’a e te tāpe’ara’a pahī ia vai maita’i noa i te pae no te mānura’a e i te pae no te pāururura’a ‘ati.

Mai te mea noa atu te ‘ite ra te ti’a ti’a’au i te tahi pahī ‘ōtare aore ra i te tahi pahī fa’aru’ehia aore ra o tei ‘ore i ‘atu’atuhia, e tei riro ‘ei ha’afifira’a no te terera’a pahī, te tautai aore ra no te arutaimāreva e, no te tere ti’a atu i te uāhu aore ra no te tāpe’ara’ i te uāhu, tei riro ‘ei tumu a fa’atomo ai aore ra a ‘ino ai te tahi pahī, te mau patura’a i taua nei vāhi aore ra o te arutaimāreva, ia fa’aara ha’ape’epe’e ‘o ia i te mau ti’a mana, ia fa’aoti-‘oi’oi-hia i te fa’aarara’a fa’ahepo i te fatu pahī ra ia rave ‘o ia i te fa’anahora’a ti’a no te araira’a i te huru fifi ato’a e riro i te tupu.

Ia ‘ore noa atu te fatu pahī e rave mai tei fa’ahepohia i roto i te tau i fa’ata’ahia, e fa’aoti te ti’a mana ia ravehia te mau ‘ohipa i tītauhia ia na mā te fa’aamora’a ia na i te mau ha’amāu’ara’a e te mau hopoi’a no te mau fifi ato’a e tupu mai i ni’a i te ‘ohipa terera’a pahī aore ra i ni’a i te tuha’a moana hau.

No te tātarara’a i te tino pahī, ia fa’atura te fatu pahī i te mau fa’auera’a a te ti’a mana.

‘Īrava 14.- ‘Ōpanira’a o te mau huru ‘ohipa ato’a i ni’a e i raro i te tairoto i roto i te mau ārea fa’ati’ahia no te tūtaura’a e te tāpe’ara’a pahī.

‘Ōpanihia te huru ‘ohipa ato’a i ni’a e i raro i te tairoto o te mau ārea fa’ati’ahia no te tūtaura’a e te tāpe’ara’a pahī, no te tumu o te pāururura’a ‘ati.

‘Īrava 15.- Piara’a parau e te ha’amāramara’a i te huirā’atira

E piahia teie fa’aotira’a hau i ni’a i te fa’aturera’a no te tūtaura’a e te tāpe’ara’a o te mau pahī i nā ‘oire no Faaa e no Punaauia, i roto i nā fare ‘oire e i te mau pū tā’amura’a pahī, na roto i te reo farāni, te reo tahiti e te reo peretāne, nā te hiti o te mau ārea fa’ata’ahia, i te tahi vaira’a e ‘ite-māite-hia e te tā’ato’ara’a.

Te fa’a’itehia nei te mau ārea fa’ati’ahia no te tūtaura’a e te tāpe’ara’a pahī, e tae noa atu te mau ārea ‘ōpani-tāmau-hia no te tūtaura’a e te tāpe’ara’a pahī, i muri i teie nei fa’aotira’a hau, e ti’a te reira i te tai’ohia i te pū no te uāhu no Papeete, i te pū no te ‘ohipa pahī no Pōrīnetia farāni (DPAM), e i ni’a i te mau tahuauira natirara : www.portdepapeete.pf e www.service-public/dpam.

Hape

‘Īrava 16.- Fa’autu’ara’a

Mā te ‘ore e ha’apaera’a i te mau fa’autu’ara’a ia au i te parau no te pāururura’a o te arutaimāreva e tō te tuha’a moana hau, e ia au i te ‘Īrava 131-13 o te puta ture fa’autu’ara’a e te puta ture no te mau pū uāhu no Pōrīnetia farāni :

1°) E fa’autu’ahia i te utu’a moni e fa’ata’ahia ra e te ‘Īrava D. 242-4 o te puta ture no te mau uāhu no Pōrīnetia farāni te mau huru hape ato’a ia au i te mau fa’aturera’a e fa’ata’ahia ra e te ‘Īrava 12 ;

2°) E fa’autu’ahia i te utu’a moni i fa’ata’ahia no te mau hape ato’a no te ‘āna’ira’a 4 :

a) Te tūtaura’a e te tāpe’ara’a i te pahī i rāpae’au i te mau ārea tūtaura’a e tāpe’ara’a fa’ati’ahia mai tei fa’ata’ahia i te ‘Īrava 6 ;

b) Te tūtaura’a e te tāpe’ara’a pahī i roto i *te mau ārea ‘ōpanihia no te tūtaura’a e te tāpe’ara’a i te pahī ia au i tei fa’ata’ahia i te ‘Īrava 7 ;*

c) Te mau hape ato’a ia au i te fa’aturera’a i te pae no te terera’a pahī mai tei fa’ata’ahia i te ‘Īrava 9 ;

3°) E fa’autu’ahia i te utu’a moni ia au i tei fa’ata’ahia i te ‘Īrava D. 242-2 o te puta ture no te mau uāhu no Pōrīnetia farāni :



- a) Te fa'atura-'ore-ra'a i te mau fa'anahora'a no te tūtaura'a e te tāpe'ara'a pahī ia au i tei fa'ata'ahia i te 'Irava 5 ;
- b) Te fa'atura-'ore-ra'a i te fāito terera'a vitiviti i roto i te mau ārea fa'ata'ahia i te 'Irava 6, e te mau arapahī terera'a ;
- 4°) E fa'autu'ahia i te utu'a moni ia au i tei fa'ata'ahia i te 'Irava D. 242-5 e te D. 242-6 o te puta ture no te mau uāhu no Pōrīnetia farāni, te pāto'ira'a i te fa'a'ohipara'a i te mau fa'aarara'a e te mau fa'auera'a i fa'ata'ahia i te rēni piti o te 'Irava 11 ;
- 5°) E fa'autu'ahia i te utu'a moni i fa'ata'ahia no te mau hape ato'a no te 'āna'ira'a 2 :
 - a) Te 'orera'a ia e auraro i te mau fa'auera'a no te fa'a'itera'a i te tomora'a e te fa'aru'era'a i fa'ata'ahia i te 'Irava 10 ;
 - b) Te ravera'a i roto i te mau ārea i fa'ata'ahia i te 'Irava 6 i te tahi 'ohipa i 'ōpanihia ia au i te 'Irava 14.

E ti'a te mau hape i fa'autu'ahia ia au i tei fa'ata'ahia no te mau hape no te 'āna'ira'a maha e te 'āna'ira'a hō'ē i te tītauhia ia au i te utu'a moni fa'aauti'a.

'Irava 17.- Hi'opo'ara'a

Mā te 'ore e fa'aiti noa a'e i te ti'ara'a tōro'a o te mau ti'a mana e te mau mūto'i, e pāpa'ihia te mau hape ato'a i 'itehia i ni'a i te parau fa'ata'ara'a e fa'aotihia mai :

- 1°) e te mūto'i farāni no te moana ;
- 2°) te mūto'i farāni ;
- 3°) te mau 'ōfītie e te mau ti'a hi'opo'a o te mau uāhu ;
- 4°) te mau ti'a hōreo no te uāhu no Papeete e te Pū no te 'ohipa rarahi a te haufenua ;
- 5°) te mau ti'a hōreo o te mau 'oire e ō mai.



Te fa'a'orehia nei te fa'aotira'a hau n° 339 CM no te 27 no māti 1987 tei fa'ahuru'ēhia, i ni'a i te fa'aturera'a o te tūtaura'a e tāpe'ara'a pahī rātere i ni'a i te tuha'a taioto a te hau no Pirae, Papeete, Faaa e o Punaauia (tuha'a moana ti'a'auhia e te Uāhu no Papeete).

Te Mono-Peretiteni, Fa'aterehau no te fa'arava'ira'a faufa'a e te 'imira'a faufa'a, ha'apa'o i te mau patura'a rahi e te fa'arava'ira'a faufa'a nātura tumu, te Fa'aterehau no te nohora'a e te fa'anahora'a fenua, ha'apa'o i te mau utara'a nā te mau motu, te Fa'aterehau no te fa'arava'ira'a faufa'a orara'a hau e te fenua a te hau, ha'apa'o i te mau mīnera e te mā'imira'a e te Fa'aterehau no te patura'a rahi e te utara'a nā te fenua tei tonohia, rātou tāta'i tahi, no te fa'ahipara'a i teie nei fa'aotira'a hau o te piahia i roto i te Ve'a a te hau no Pōrīnetia farāni.

Ravehia i Papeete, i te 2 no tiunu 2020

Nā te Peretiteni no Pōrīnetia farāni

Edouard FRITCH

Te Mono-Peretiteni,
Fa'aterehau no te fa'arava'ira'a faufa'a
e te 'imira'a faufa'a,
*ha'apa'o i te mau patura'a rahi
e te fa'arava'ira'a faufa'a nātura tumu*

Te Fa'aterehau
no te nohora'a
e te fa'anahora'a fenua,
ha'apa'o i te mau utara'a nā te mau motu

Teva ROHFRITSCH

Jean-Christophe BOUISSOU

Te Fa'aterehau
no te fa'arava'ira'a faufa'a orara'a hau
e te fenua a te hau,
*ha'apa'o i te mau mīnera
e te mā'imira'a*

Te Fa'aterehau
no te patura'a rahi
e te utara'a nā te fenua

Tearii ALPHA


René TEMEHARO



Parau 'āpiti 1

I te fa'aotira'a hau n°00650/CM no te 2 no tiunu 2020

Motira'a o te ārea tūtaura'a pahī i te hiti o nā 'oire no Faa'a e Punaauia



Service de la Traduction et de l'Interprétariat, n° 595TRAD2020 du 12 juin 2020

40 43 21 40 / B.P. 20714 - 98713 Papeete - Tahiti - Polynésie française

Traduction demandée par : Port Autonome, chuukena@portppt.pf




Parau 'āpiti 2

I te fa'aotira'a hau n°00650/CM no te 2 no tiunu 2020


Motira'a o te ārea tūtaura'a pahī i te hiti o nā 'oire no Faa'a e Punaauia





I te fa'aotira'a hau n°00650/CM no te 2 no tiunu 2020


Motira'a o te ārea tūtaura'a pahī i te hiti o nā 'oire no Faa'a e Punaauia



Parau 'āpiti 4

I te fa'aotira'a hau n°00650/CM no te 2 no tiunu 2020

Motira'a o te ārea tūtaura'a pahī i te hiti o nā 'oire no Faa'a e Punaauia



Service de la Traduction et de l'Interprétariat, n° 595TRAD2020 du 12 juin 2020

40 43 21 40 / B.P. 20714 - 98713 Papeete - Tahiti - Polynésie française

Traduction demandée par : Port Autonome, ehuukena@portppt.pf

